

昭
代
典
則

昭代典則卷之三

賜進士太子少保刑部尚書晉江黃光昇編輯

吳郡陸翀之校閱

金陵周日校刊行

太祖高皇帝

壬寅 春正月蒙古張良弼敗李思齊于武功

察罕街張良弼與李思齊遣兵圍良弼於鹿臺元主復
詔和解之恐其終不和也乃命思齊擊四川良弼擊
漢以分其勢尋申諭二將各以兵自效未幾思齊復遣
兵攻良弼至於武功良弼伏兵大破之

辛酉我 高皇帝至龍興

江西行省丞相胡廷瑞既降我 高皇帝遂發九江如
龍興辛酉胡廷瑞祝宗等俱迎新城門外 高皇帝慰
勞之俾各仍舊官壬戌入城存恤鰥寡孤獨放陳友諒
所蓄鹿于西山戊辰築臺於城北龍沙之上召城中父
老民人悉集臺下諭之曰自古攻城掠地鋒鏑之下民
罹其殃今爾民得保骨肉安生理無所苦者皆丞相胡
廷瑞灼見天道先機來歸爲爾民之福陳氏據此軍旅
百需之供爾民甚苦之今吾悉去其弊軍需供億俱不
以相勞爾等各事本業毋游惰毋作非爲以陷刑辟毋
交結權貴以擾害良善各保父母妻子爲吾良民於是
士民皆感悅乃改龍興路爲洪都府以葉琛知府事○

鄧克明既逃歸新淦復收集舊部曲仍肆劫掠。高皇帝至龍興遠近皆降。克明懼不自安欲復降恐見誅乃詐爲商賈乘小舟至龍興城下潛使人覘伺可否爲去就事覺被執并獲克明。高皇帝責其反覆不誠因送建康。

辛未寧州土豪陳龍以分寧奉新通城靖安德安武寧六縣來降。○癸酉陳友諒守吉安上軍元帥孫本立曾萬中曾粹中來降以本立爲江西行省叅政萬中爲都元帥粹中爲行軍指揮命還守吉安。○故徐壽輝袁州守將陳祥來降命以本部軍馬仍守袁州。○乙亥陳友諒平章彭時中以龍泉來降。○二月彗星見。

初見於危宿。光芒長丈餘。色青白。丁酉犯離宮。西星至。二月終。光芒長二丈餘。三月戊申以後。不見星形。惟有白氣。壬子行過太陽前。惟有星形。無芒。在昴宿。至戊午。凡三十四日始滅。

癸未。金華賊蔣英等殺我守臣胡大海。降于張士誠。嚴州守臣朱文忠尋撫定之。

初。大海下嚴州。劉震等從員成。自桐廬來降。大海喜其驍勇。留致麾下。待之不疑。至是。震等謀亂。以大海遇已厚。未忍發。李福謂其衆曰。胡叅政待我輩甚厚。然兵之柄在主將。不殺主將。則事不成。舉大事。寧暇顧私恩乎。衆從之。以書通衢處苗帥李祐之等。約以二月七日同

舉兵。是日蔣英等入分省署。陽請大海至八詠樓下。覲
督。大海出。將上馬。英令其黨鍾矮子跪于馬前。陽訴曰。
蔣英等欲殺我。大海未及答。反顧英。英袖出鐵棍。若擊
矮子狀。因中大海腦。仆地。英卽斷其首。提於馬上。以示
同僉。寧安慶院判張斌。脇其從已。復殺大海子。關住。執
郎中王愷。愷正色曰。吾職居郎署。同守此土。義當死。寧
從賊耶。劉震欲全之。賊黨吳得真與之有隙。曰。無自遺
患。遂殺愷及其子寅。掾史章誠亦歿之。典吏李斌懷省
印。縋城走嚴州。告變于朱文忠。文忠遣元帥何世明。掾
史郭彥仁等率兵討之。至蘭溪。英等懼。乃大掠城中。子
女西走。降於張士誠。世明軍入城。張斌吳得真復來降。

世明知王愷爲得直所害縛至馬前欲殺之斌力請曰
叛一得真則降者皆懼後人不復來降矣乃釋之大海
養子德濟聞難引兵奔計高皇帝卽命左司中楊
元杲至金華總理軍儲事文忠亦率將士至金華鎮撫
其民既入父老疲道訴曰士民不幸遭叛寇屠戮日夜
望王師以解倒懸今將軍至吾屬無患矣文忠勞勉之
分遣左右遍行鄉邑撫輯民人乃大安

丁亥處州賊李祐之等殺我守臣耿再成平章邵榮等率
兵討平之

處州苗軍元帥李祐之賀仁得蔣英等已殺胡大海遂
作亂院判耿再成方與客飲聞亂卽上馬收兵不及迎

賊罵曰。賊奴國家何負汝。乃敢反。賊將直前刺再成。中頸。死。分省部事孫炎被執。幽之空室。賊卒環守之。脅炎降。炎不屈。賀仁得以炙鴈斗酒饋炎。炎不受。曰。今日乃爲鼠輩所困。然我死死爲主反覆賊奴。狗且不食。守卒怒。拔刀叱炎解衣。炎曰。此紫綺裘。乃主賜我者。吾當服以死。遂害之。知府王道同爲賀仁得所。迫亦不屈而死。高皇帝聞處州之亂。命平章邵榮率兵討之。朱文忠聞亂。亦遣元帥王祐等率兵屯縉雲。榮及祐等攻處州。燒其東北門。軍士登城以入。李祐之自殺。賀仁得走縉雲。耕者縛之。檻送伏誅。處州復平。以王祐守之。榮乃還。

辛卯我 高皇帝還建康

我高皇帝既定洪都，乃經度城守，以舊城西南臨水，不利守禦，命移入三十步東南空曠，復展二里以郛，食爲江西叅政，留守洪都。萬思誠爲行省都事以佐之，胡廷瑞等還建康。

夏四月朔，長星見。

其形如春長數十丈，在虛危之間，四十餘日始滅。

○乙亥，焚賊

不見。

焚賊，離太陽三十九度，不見，當出不出。

○叛賊祝宗等陷我洪都，右

丞徐達等復取之。

癸亥，祝宗、康泰叛，攻陷洪都府。初，洪都之降，非二人本心。既降，數有叛意。時出語咎胡廷瑞，廷瑞反覆開諭之，故未即發。及高皇帝還建康，廷瑞恐二人爲變，不利於已，乃微言於高皇帝，即發使詣洪都，令二人將所

部兵往湖廣。從徐達聽征。二人舟次女兒港。遂以其眾
叛。適遇商人布帆。因掠其布爲旗號。反兵劫洪都。是日
暮至城下。發礮舉火。攻破新城門。賊殺官軍。時鄧愈居
故廉訪司。聞變倉卒。以數十騎出走。數與賊遇。且戰且
走。從者多遇害。愈窘甚。連跳跨三馬。馬輒踣。幾不免。最
後得養子所乘馬。始得脫。從撫州門出走。還建康。於是
都事萬思誠。知府葉琛。皆死于難。愈至建康。具言康祝
之叛。高皇帝命徐達等還討之。達等師抵城下。祝宗
康泰分兵拒守。達攻破之。復取洪都。祝宗走新淦。依鄉
志明。後爲志明所殺。函其首來。建康泰走康信爲追兵
所獲。送建康。泰。胡廷瑞之甥。高皇帝以廷瑞故。特有

之丙午命大都督朱文正統元帥趙德勝等同叅政鄧愈鎮洪都

明玉珍破雲南遂自稱隴蜀王

初玉珍聞陳友諒弒徐壽輝謀欲討之乃整兵守夔關不與相通復立廟以祀壽輝至是遂自稱隴蜀王分兵克龍州犯興元鞏昌諸縣陝西叅政車里帖木兒擊敗之擒其弟明二

六月彗出紫薇垣○西域回人那兀納總諸番互市至泉州作亂遂據州城蒙古平章燕只不花遣陳駭討平之○田豐觀察罕帖木兒蒙古以其子墻廓帖木兒代總其兵時山東俱平惟益都獨城不下察罕移兵圍之大治攻

具諸道並進。賊悉力拒守。田豐復與王士誠陰謀刺殺察罕。叛人城初。豐來降。察罕推誠待之。不疑。數入其帳中。及是。豐乃給諸行營衆以爲不可往。察罕曰。吾推心待人。安得人人而防之。左右請以力士從。又不許。又從十一騎行至豐營。遂爲士誠所刺。先是有白氣如索長五百餘丈起危宿。貫太微垣。太史奏山東當大水。元主曰。不然。山東必失一良將。即馳詔戒察罕勿輕舉。未至而已。及於難。詔贈河南行省左丞相。封潁川王。謚忠襄。命其子擴廓帖木兒爲平章政事。兼知山東河南行樞密院事。代總其兵。擴廓帖木兒本察罕之甥。幼養之以爲子。○晏璧曰。當元氏之季。位顯官厚。祿者何限。而

掘忠効義乃出於草澤之人如察罕者誠偉然特立丈夫也李思誠雖共起義兵而未變臣節有愧察罕多矣秋七月丙辰平章邵榮叅政趙繼祖謀反伏誅

榮粗勇善戰與高皇帝同起兵濠梁帝待之甚厚自平處州還益驕蹇有覬覦心常憤憤出怨言部將有欲告之者榮惧不自安與趙繼祖謀俟間作亂至是帝聞兵三山門外榮與繼祖伏兵門內欲爲變會大風猝發吹旗觸帝衣帝異之易服從上道還榮等不得發遂爲宋國興所告帝召榮等面詰之具伏帝不欲即誅繫于別室召諸將曰吾不負邵榮而榮所爲如此將何以處之常遇春曰榮等兇悖一旦忘恩義謀爲亂逆不利於

主。公。害。及。我。等。縱。主。公。不。忍。殺。之。我。等。義。不。與。之。俱。生。帝。不。得。已。命。具。酒。食。飲。食。之。涕。泣。與。訣。皆。就。諒。

八。月。陳。友。諒。遣。將。熊。天。瑞。寇。我。吉。安。陷。之。殺。守。將。孫。本。立。大。都。督。朱。文。正。復。取。吉。安。

陳。友。諒。遣。將。熊。天。瑞。寇。吉。安。守。將。孫。本。立。戰。敗。走。永。新。天。瑞。復。攻。破。永。新。執。本。立。至。贛。州。斬。之。友。諒。使。其。知。院。饒。鼎。臣。守。吉。安。鼎。臣。慄。悍。有。膽。略。所。至。害。毒。人。呼。爲。饒。大。膽。初。天。瑞。寇。吉。安。本。立。遣。元。帥。曾。萬。中。梓。中。間。道。走。建。康。求。救。時。大。都。督。朱。文。正。鎮。洪。都。高。皇。帝。遂。命。文。正。往。救。之。師。未。發。而。吉。安。陷。文。正。遣。裨。將。率。兵。取。吉。安。饒。鼎。臣。出。走。遂。以。叅。政。劉。齊。陳。海。同。李。明。道。曾。萬。中。梓。

中共守之以朱叔華知府事兵還洪都

冬十一月蒙古擴廓帖木兒拔益都執田豐等斬之

擴廓既領兵復讐誓必討賊而賊城守益固乃穴地道以入拔其城執賊首陳孫頭等二百餘人獻闕下而取田豐王士誠之心以祭其父餘黨皆就誅遂遣兵取
莒州山東悉平

蒙古樞密副使李士瞻上疏極論時政不報

疏凡二十條一曰悔已過二曰罷造作三曰講論聖學
四曰詢謀老成五曰去姑息六曰開言路七曰明賞罰
八曰公選舉九曰察佞倖十曰嚴宿衛十一曰省佛事
十二曰絕濫賞十三曰罷各官屯田十四曰減常歲計

置十五曰招集衛兵十六曰廣開屯田十七曰獎勵守
令十八曰禮待藩鎮十九曰分遣大將急保山東二十
曰依唐廣寧故事分道進取先是脫火赤言乞罷三官
造作元主爲減軍匠之半還隸宿衛而造作如故士瞻
首及之疏入不報

十二月蒙古立塔思帖木兒爲高麗王遣兵送之國高麗
以兵拒之大敗而還

初皇后奇氏宗族在高麗者恃寵驕橫爲國王伯顏帖
木兒所殺元主入后之讒遂廢伯顏帖木兒而議立其
昆弟在京師者塔思帖木兒爲王以奇族子三寶奴爲
元子國人上書言舊王不當廢新王不當立元主不聽

乃以將作同知崔帖木兒爲丞相率兵萬人送之。因至鴨綠江，高麗伏兵四起，乃大敗，僅餘七十騎走歸京師。蒙古擴廓帖木兒遣使以書來獻馬。

先是擴廓父察罕帖木兒駐兵汴梁。高皇帝嘗遣使通好，既而察罕亦以書來聘。帝以前所遣使不還，不之荅。至是察罕已死，擴廓帖木兒代領其衆，乃遣尹煥章送我使者自海道還，因以馬來獻。帝遣中書省都事汪河送尹煥章歸汴，以書報擴廓帖木兒曰：元失其政中，原鼎沸，廟廊方岳之臣互相疑沮，喪師者無刑，得志者方命，悠悠歲月，卒致土崩，閣下奮起中原，英勇智謀，過於群雄，聞而未識，是以遣人直抵大梁，實欲縱觀，未敢

納交也不意先王捐館閣下意氣相期遣送使者涉海而來深有推結之意加之厚貺何慰如之薄以文辭若干用酬雅意自今以往信使繼踵商賈不絕無有彼此是所願也

癸卯

春正月朔明玉珍稱帝於蜀

國號大夏改元天統

○歲星退

犯軒轅大星○二月蒙古擴廓帖木兒引兵還河南

擴廓留鎖住以兵守益都自還河南元朝方倚之爲安而孛羅帖木兒自察罕既歿數以兵爭晉冀雖屢詔諭解而讐隙日深○胡粹中曰擴廓既克田豐等正當乘銳收復中原諭告群雄共輔王室乃引兵還河南爲自安之計朝廷何所倚乎

壬申申將士屯田之令

我高皇帝初命諸將分軍於龍江等處屯田至是康茂才屯積充牣他將皆不及乃下令申諭將士曰興國之本在於強兵足食自兵興以來民無寧居田地荒蕪兵食盡資於民則民力重困故令爾將士屯田且耕且戰今各處大小將帥已有分地然隨處地利未能盡墾惟康茂才所屯田穀一萬五千餘石以給軍餉尚餘七千餘石以此較彼地力均而入有多寡其故何哉蓋人力有勤惰故耳自今諸將宜督軍士及時開墾以收地利庶幾兵食充足國有所賴

三月彗星見東方○張士誠入安豐殺劉福通據其城我

走之

先是劉福通等兵勢日蹙以安豐來附至是張士誠遣將呂珍攻安豐入其城殺福通等三月辛丑高皇帝率右丞徐達叅政常遇春等擊安豐呂珍聞大軍至乃水陸連營戰艦蔽河沙際皆樹木柵繚以竹籬外瀉重堦極力以拒我師先攻拔其中壘入據之呂珍急攻我師殊死戰高皇帝命遇春以兵橫擊其陣三戰三勝珍兵大敗時廬州左君弼以兵助珍遇春又擊敗之珍與君弼皆遁走帝還命徐達等移師廬州圍之夏四月焚惑犯歲星○蒙古擴廓帖木兒遣兵攻張良弼初李思齊與察罕同起義師齒位相等及擴廓總兵思

齊心不平。而良弼孔興脫列伯。皆恃功懷異。遂成讐敵。擴廓乃遣關保虎林赤西攻良弼於鹿臺。而思齊與良弼合兵。決北攻罷。○胡粹中曰。擴廓初統父兵。不思効忠。以靖國難。既修怨。字羅。又開釁。良弼兵連不解。卒之無功。以至國亡。由是而言。擴廓亦群雄之一。未可以言純臣也。

五月朔。陳友諒知院饒鼎臣等復陷我吉安。執叅政劉齊知府朱叔華。遂破臨江。執同知趙天麟。皆不屈。友諒以三人徇于洪都下。○陳友諒兵陷無爲州。知州董曾死之。○秋七月。陳友諒寇洪都。我高皇帝率諸將討之。大戰于鄱陽湖。友諒伏誅。子理走據武昌。

四月壬戌陳友諒忿其疆場日蹙乃作大艦來攻洪都艦高數丈飾以丹漆上下三級級置走馬棚下設板房爲蔽置艣數十其中上下人語不相聞艣箱皆裹以鐵自爲必勝之計載其家屬百官空國而來洪都城始鑿大江友諒前攻城以大艦乘水漲附城而登故爲所破高皇帝旣定洪都命移城去江三十步以是友諒巨艦不復得近乃以兵圍城其氣甚盛都督朱文正與諸將謀分城拒守叅政鄧愈守撫州門元帥趙德勝守宮步士步橋步三門指揮薛顥等守章江新城二門元帥牛海龍等守琉璃澹臺二門文正居中節制諸軍自將精銳二千往來以禦之內寅友諒攻撫州門其兵各

戴竹盾如箕狀以禦矢石極力來攻城壞三十餘丈鄒愈以火銃擊退其兵隨豎木柵敵爭柵都督朱文正督諸將死戰且戰且築通夕城完於是總管李繼先元帥牛海龍趙國旺許珪朱潛萬戶程國勝等皆戰死五月丙子陳友諒復攻新城門指揮薛顯將銳卒開門突戰斬其平章劉震昭敵兵廼退百戶徐明被執宛之六月辛亥陳友諒增修攻具攻水閘欲破柵以入都督朱文正使壯士以長槩從柵內刺之敵奪槩更進文正乃命煖鐵戟鐵鈎穿柵更刺敵復來奪手皆灼爛不得進友諒盡攻擊之術而城中備禦隨方應之友諒計窮又以兵攻官步士步二門元帥趙德勝忠禦之恭坐官步門

樓指揮士卒。中流矢死。洪都被圍既久。內外阻絕。言詞不通。文正乃遣千戶張子明告急于建康。子明取東湖小漁舟。夜從水關潛出。越石頭口。夜行晝止。至是凡半月。始得達見。高皇帝具言其故。帝問友諒兵勢何如。子明對曰。友諒兵雖盛。而戰鬪死者亦不少。今江水日涸。賊之巨艦將不利用。又師久糧乏。若援兵至。必可破也。帝謂子明曰。汝歸語文正。但堅守一月。吾自當取之。不足慮也。子明還至湖口。爲友諒所獲。友諒謂曰。若能誘城降。非但不死。且得富貴。子明僞許之。至城下大呼曰。大軍且至。但固守以待。友諒怒。遂殺之。先是徐達嘗遇春攻圍廬州城。三面阻水。攻之凡三月不下。帝乃召

徐達常遇春於廬州。令還師援洪都。秋七月癸酉。帝自將救洪都。達遇春亦自廬州還。帝召諸將諭之曰。陳友諒構兵不已。復圍洪都。彼累敗不悟。是天奪其魄而促之亡也。吾當親往。爾諸將其各整舟楫。率士馬以從。是日會師。檣蔽于龍江。舟師凡二十萬。俱發。癸未。師次湖口。先遣指揮戴德以一軍屯于涇江口。復以一軍屯南湖。背以遏友諒歸師。又遣人調信州兵守武陽渡。防其奔逸。丙戌。陳友諒圍洪都。至是凡八十有五日。聞大軍至。即解圍。東出鄱陽湖以迎我師。高皇帝率舟軍由松門入鄱陽湖。諭諸將曰。兩軍相鬪。勇者勝。陳友諒久圍洪都。今聞我師至而退兵迎戰。其勢必先鬪。諸公當

元龍相遇
關英英湖
水停流魚
驚驚滿野
黃天天地
明波詩盡
作戰爭聲

蘇方有進無退剪滅此虜正在今日諸將受命皆自帝
丁亥遂與友諒師遇於康郎山友諒列巨舟以當我師
帝見之謂諸將曰彼巨舟首尾連接不利進退可破也
乃命舟師爲十一隊火器弓弩以次而列戒諸將近冠
舟先發火器次弓弩及其舟則短兵擊之戊子命徐達
常遇春廖永忠等進兵薄戰立身先諸將擊敗其前軍
殺千五百人獲一巨舟而還軍威大振俞通海復乘風
發火炮焚寇舟二十餘艘彼軍殺溺者甚衆元帥宋貴
陳兆先等亦戰死徐達等搏戰不已火延及達舟敵遂
乘之達搏火更戰帝急遣舟援達達力戰敵乃退友
諒驍將張定邊奮前欲犯帝舟舟適膠淺我軍格鬪

計無所出牙將韓成進曰古人殺身以成仁臣不敢愛其死乃服上冠袍對敵自投水中敵人信之攻少緩遇春從旁射中定邊定邊舟始却通海來援舟驟進水湧帝舟遂脫永忠遂以飛舸追定邊定邊走身被百餘矢士卒多歿傷既而遇春舟亦膠淺帝麾兵救之俄有敗舟順流而下觸遇春舟舟亦脫會日暮諸軍欲退帝御樓船鳴鉦集諸將申明約束喻以死生利害諸將咸以手加額以死自誓是日命徐達還守建康己丑旦帝命鳴角舟師畢集乃親佈陣復與友諒戰諸軍奮擊敵舟敵不能當殺溺死無算院判張志雄所乘舟槓折為敵所覺以數舟攢兵鉤刺之志雄窘迫自刎丁普郎

公輔皆戰死普郎身被十餘創首脫猶執
兵若戰狀植立舟中不仆敵兵舟艦相連至曉東北風
起帝命以七舟載荻葦置火藥其中束草爲人飾以甲
冑各持兵戟若鬪敵者令敢死擁之備走舡于後將迫
敵舟乘風縱火風急火烈湏臾抵敵舟焚水寨舟數百
艘燐烟漲天湖水盡赤死者大半友諒弟友仁友貴及
其平章陳普略等皆焚死我師乘之又斬二千餘級友
仁者即所謂五王也耿一目有智數果勇善戰至是死
友諒爲之喪氣普略即新開陳也明日帝復諭諸將曰
友諒戰敗氣沮亡在旦夕今當併力蹙之於是諸將亦
自奮是時帝所乘舟檣白友諒覺欲併力來攻帝知之

夜令諸船盡白其檣旦時莫能辨敵益驚駭辛卯復駐舟大戰敵兵巨艦艱於運轉我舟環攻之殺其卒殆盡而操舟猶不知尚呼號搖櫓如故已而焚其舟皆死俞通海廖永忠張興祖趙庸等以六舟深入搏擊敵連大艦極力拒戰我師望六舟無所見意謂已陷沒有頃六舟旋繞敵船而出我師見之勇氣增倍合戰益力呼聲動天地波濤起立日爲之晦自辰至午敵兵大敗棄旗鼓器仗浮蔽湖面友諒遂奪氣張定邊自以戰不利欲挾友諒退保鞋山爲我師所扼不得出乃歛舟自守不敢更戰通海等還帝勞之曰今日之捷諸公之力也是日移舟泊柴棚去敵船五里許復遣人往挑戰敵不敢

應諸將議欲退師。少休士卒。帝曰：兩軍相持，我若先退，彼必以爲怯而來追，非計也。必先移舟出湖，乃可無失。時水路狹隘，舟不得並進，恐爲敵所乘。至夜，令船置一燈，相隨渡淺。比明，已盡渡矣。乃泊於左。盡友諒遂亦移舟出泊。渚磯相持者三日。友諒左右二金吾將軍率所部來降。先是友諒數戰不利，咨謀於其下。右金吾將軍曰：今戰不勝，出湖實難。莫若焚舟登陸，直趨湖南，謀爲再舉。其左金吾將軍曰：今雖不利，而我師尤多，尚堪一戰。若能僂力，勝負未可知。何至自焚以示弱？萬一捨舟登陸，彼以步騎躡我後，進不及前，退失所據，一敗塗地，豈能再舉耶？友諒猶豫不決。至是戰多喪敗，乃曰：右金

吾之言是也。左金吾將軍聞之，懼及禍，遂以其眾降右金吾，見其降，亦率所部來降。友諒失此二將，自是兵力益衰。帝既駐師左蠡，移書友諒曰：「方今取天下之勢，同討夷狄以安中國，是爲上策。結怨中國而後夷狄是爲無策。曩者公犯池州，吾不以爲嫌，生還俘虜，將欲與公爲約從之舉，各安一方，以俟天命。此吾之本心也。公失此計，乃先與我爲仇。我是以破公江州，遂蹂躪黃漢沔之地，因舉龍興十一郡奄爲我有。今又不悔，復起兵端一困於洪都，兩敗於康山，殺其弟姪，殘其兵將，損數萬之命，無尺寸之功。此逆天理，悖人心所致也。公乘尾大不掉之舟，隕兵弊甲，與吾相持，以公平日之強暴正當。」

親決一戰何徐徐隨後若聽吾指揮者無乃非丈夫乎
公早決之友諒得書怒留使者不遣猶建金字旗週迴
巡寨今獲我戰士皆殺之帝聞之命悉出所俘友諒軍
視其軍有傷者賜藥療之皆遣還下令曰但獲彼軍皆
勿殺又令祭其弟姪及將之戰死者我師遂出湖口命
遇春永忠諸將統舟師橫截湖口邀其歸路又令一軍
立柵于岸控湖口旬有五日友諒不敢出復移書與之
曰昨兵船對泊渚磯嘗遣使賁記事往不覩使回公度
量何淺淺哉大丈夫謀天下何有深仇夫自辛卯以來
天下豪傑紛然並起邇來中原英雄興問罪之師挾天
子令諸侯於是淫虐之徒一掃而亡公之湘陰劉亦懼

而往此公腹心人也部下將自此往矣江淮英雄惟存
吾與公耳何乃自相吞併公今戰亡弟姪首將又何怒
焉公之土地吾已得之縱力驅殘兵來死城下不可匪
得也設使公僥倖逃還亦宜修德勿作欺人之容却帝
名而待真主不然喪家滅姓悔之晚矣友諒忿恚不荅
帝與博士夏煜等日草檄賦詩意氣彌壯友諒住湖中
既久食盡遣舟五百艘掠糧于都昌都督朱文正復使
舍人陳方亮潛往燔其舟友諒糧絕勢益困八月壬戌
陳友諒窮蹙進退失據欲奔還武昌乃率樓船百餘艘
趨南湖首爲我軍所遏遂欲突出湖口帝麾諸將邀擊
之我舟與敵舟懸比隨流而下自辰至酉力戰不已至

江口。涇江之兵復擊之。張鐵冠大笑。賀帝曰。友諒必
矣。帝笑曰。無妄言。復戲鐵冠曰。縛汝於水濱以俟。乃遣
樂人具牲酒。往祭友諒。以覘其死生。且曰。如其生往者
必還。若不還。其死必矣。而往者俱被殺。未幾有降卒來
奔。言友諒在別舸中。流矢貫睛。及顛而歿。諸軍聞之大
呼喜躍。殺敵益奮。敵衆大潰。於是擒其太子善兒。平章
姚天祥等。明日友諒平。章陳榮。叅政曾某。樞密使李才
小舍命王副樞賈僉院及指揮以下。悉以其樓船軍馬
來降。得士卒五萬餘人。惟太尉張定邊及楊丞相韓副
樞乘夜以小舟竊載友諒屍。及其子理。徑走武昌。遣使
追之不及。定邊等至武昌。復立理爲帝。改元德壽。廼改

洪都府爲南昌府遣兵追陳理于武昌

太白犯左執法歲星犯右執法○九月太白犯鎮星辰星犯亢○張士誠自稱吳王蒙古遣使徵糧不與

先是士誠雖降蒙古授官而城池中兵錢穀皆自據如故又素忌楊完者欲啗之而達識帖睦迺亦厭完者驍肆不可制乃陰與定計舉兵啗之完者及其弟伯顏皆自殺士誠遂遣兵據杭城元朝因以其弟士信爲江浙行省平章政事而方面大權悉歸張氏達識帖睦迺徒擁虛名而已至是士誠乃令其部屬自頌功德求王爵達識帖睦迺恐逆其意爲所害乃爲請于元朝至再三不報士誠遂自立爲吳王即平江治宮室立官屬元遣

信徵糧于張士誠士誠不與東南游運遂絕

壬申我高皇帝至建康

壬申帝至建康告廟飲至論功行賞因與諸將論鄱陽之戰諸將請曰自古水戰必得天時地利若周瑜之破曹操因風水之便陳友諒兵據鄱陽先處上流而待我是得地利矣况我勞而彼佚今勝之誠未喻也帝曰汝不聞古人云天時不如地利地利不如人和陳友諒兵雖衆人各一心上下猜疑別用兵連年數敗無功不能養威俟時今日適勞於東明日又馳於西失衆心也夫師貴時動動則威威則勝我以時動之師威不震之虜將士一心人百其勇如鷲鳥搏擊巢卵俱覆此所

以爲吾破也諸將皆嘆服

壬午我高皇帝復率常遇春等討陳理於武昌

壬寅帝至武昌馬步舟師水陸並進既抵其城命遇春等分兵於四門立柵圍之又於江中聯舟爲長寨以絕其出入之路分兵徇漢陽德安州郡於是湖北諸郡皆來降

冬十月朔山東赤氣千里○蒙古孛羅帖木兒遣兵攻葉寧擴廓帖木兒擊走之

先是擴廓侵孛羅孛羅奏其蹈襲父惡有不臣之罪至是復攻葉寧至石嶺閱擴廓大破之擒其二將軍遂不振

十一月蒙古殺太傅太平

初元主欲以伯撒里爲相。辭曰：臣老不足以任宰相。若必以命臣，非得太平同事不可。時太平辭歸奉元。於是密旨令伯撒里留之。太平至沙井關，聞命而止，宿留久之。太子聞其已去而復留，令御史普化劾其違命，詔拘收所授宣命。糊思監因誣奏之，尋遣使至東勝，逼令自裁。年六十三。○胡粹中曰：至正宰相惟太平德宏識遠，爲時論所服。故朶兒只紐的該、伯撒里皆國勲舊，拳拳推獎不賢而能若是乎？當時國危政亂，奸邪視忠直如仇，惟恐去之不速。而太平聞命宿留，雖曰一飯不忘然忠，不見信卒蹈危禍，可悲也夫。

十二月蒙古治書侍御史陳祖仁上書被黜

時宦者朴不花橐驪內侍太子外結搆思監驕恣不法御史傅公讓劾之忤太子意坐左遷祖仁上疏太子言天下者祖宗之天下臺諫者祖宗之建立顧以二監之而於天下之重臺諫之言一切不恤獨不念祖宗乎且殿下職在監國撫軍問安視膳而已予奪賞罰之權自在君父今方毓德春宮反使諫臣結舌凶人肆志豈惟君父徒擁虛器天下蒼生亦將奚望疏入太子怒令御史大夫老的沙論祖仁以橐驪等初無是事御史糾言不實已與美除昔裕宗爲太子凡事合奏者皆許啓聞非獨我今日也祖仁乃復上疏言殿下所以全此二人

者正緣不知其奸故也然舉朝知之在野知之天下知之獨殿下未知耳於是太子以其事問二人皆辭以元主又令老的沙喻旨祖仁復上疏言祖宗以天下傳之陛下今乃壞亂不可救藥雖曰天運依然亦刑賞不明之所致也區區二豎猶不能除况於大者願陛下顯斥二人勿令以辭退爲名成其奸計使海內皆知陛下信賞必罰自二人始則將士亦必効力天下可全壽考元主大怒時侍御史李國鳳亦言二人當斥於是臺官自老的沙以下皆左遷而出祖仁于肅老的沙遂與秃堅帖木兒逃于孛羅帖木兒軍中

甲寅我 高皇帝至建康

十二月丙申朔帝發武昌至建康命常遇春總督諸將守營柵諭之曰彼猶孤他處半中欲出無由久當自服若來衝突慎勿與戰但堅守營柵以困之不患城不下也甲寅帝至建康戊午閱武于鷓鴣山還坐西苑召指揮華雲龍等諭之曰今日所閱騎士汝能知其數否對曰不知帝曰陣勢或員或方或縱或橫歛合布散倏忽往來使人莫測善用兵者以少爲衆以弱爲強逸己而勞人伐謀而制勝運乎陰陽行乎鬼神雖有勇者莫敢施其力智者莫能用其謀斯爲妙矣大抵兩敵相對在審其強弱識其多寡以正應以奇變奇正之用合宜應變之方弗失百戰百勝之道也汝等其識之

甲寅 春正月我 高皇帝建國號曰吳

丙寅朔李善長徐達等屢表勸進 帝曰戎馬未息瘵
瘵未蘇天命難必人心未定若遽稱尊號誠所未遑今
日之議且止俟天下大定行之未晚羣臣固請不已乃
卽吳王位置中書省官屬以李善長爲右相國徐達爲
左相國常遇春俞通海爲平章政事汪廣洋爲右司郎
中張瑄爲左司郎中諭達等曰卿等爲生民計推戴予
然建國之初當先正紀綱元氏昏亂紀綱不立主荒臣
專威福下移由是法度不行人心渙散遂致天下騷亂
今將相大臣當鑒其失宜協心爲治以成功業毋苟且
因循徒取充位而已又曰禮法國之紀綱禮法立則人

志定。上下安。建國之初。此爲先務。吾昔起兵。濠梁見當
時主將。皆無禮法。恣情任私。縱爲暴亂。不知馭下之道。
是以卒至於亡。今吾所任將帥。皆昔時同功一體之人。
自其歸心於我。即與之定名分。明號令。故諸將皆聽命。
無敢有異者。爾等爲吾輔相。當守此道。無謹於始而忽
於終也。

二月我平高皇帝復往武昌。視師。陳理請降。湖廣江西悉

二月乙未。帝以諸將圍武昌。久不下。復親往視師。辛
亥。至武昌。督兵攻城。先是。陳理太尉張定邊見事急。遣
卒夜由觀音閣。趨城走岳州。告其丞相張必先。使入援。

至是必先引兵至去城二十里軍于洪山帝命常璉率精銳五千乘其衆未集擊之敵兵大敗遂擒必先必先驍勇善戰人號爲潑張城中尙以爲重至是縛至城下示之曰汝所恃者潑張今已爲我擒尙何恃而不降耶必先亦呼定邊謂之曰吾已至此事不濟矣兄宜自圖速降爲善定邊氣索不能言武昌城東南有高冠山下瞰城中帝問諸將誰能奪此傅友德請行遂率數百人一鼓奪之城中立喪氣後數日帝乃遣友諒舊臣羅復仁入城諭陳理及張定邊等曰理若來降當不失富貴復仁因請曰主上推好生之仁惠此一方使陳氏之孤得保首領而臣不食言臣雖死不憾矣帝曰吾兵力

非不足所以久駐此者。欲待其自歸免傷生靈耳。汝行必不誤。復仁至城下號哭。理驚召之入。復相持痛哭止。問故。復仁諭以帝意。詞旨懇切。理與定邊等遂請降。癸丑。陳理銜壁內袒率其太尉張定邊等出降。理至軍門俯伏戰慄。不敢仰視。帝見其幼弱。起挈其手曰。吾不爾罪。勿自懼也。命宦者入其宮。傳命慰諭友諒父母。凡府庫儲蓄。令理悉自取之。遣其文武官僚以次出門。妻子資裝皆俾自隨。王師圍武昌凡六閱月而降。士卒無敢入城市井晏然。城中民飢。因帝命給米賑之。召其父老復撫慰之。民大悅。於是漢沔利岳郡縣相繼降。乙卯立湖廣行中書省。以樞密院判楊璟爲參政。

抄陳友諒兄友才來降

友才始以友諒命與左丞王忠信守潭州聞帝親征武昌遣忠信援之忠信戰敗而降帝授忠信參政俾仍守潭州友才聞其降而復來率兵拒于益陽之高山忠信異詞開諭之於是友才亦降與其子大俱送建康

三月乙丑朔我高皇帝至建康

二月丙辰帝發武昌命常遇春發遣陳理官屬赴建康三月乙丑帝至建康丙寅封陳理爲歸德侯下令諭臣民曰予以耿躬荷天地百神之眷託於億兆臣民之上戡定綏寧疆宇日濶乃者陳友諒弑主僭逆罪惡貫盈自起兵端犯我邊境爰舉問罪之師以慰來蘇之

望賴天地之靈兵之所至罔不克捷江西諸郡一鼓而
下友諒稔惡不悛仍合餘燼於癸卯七月傾兵洪都城
下予乃總率舟師親與決戰友諒敗死將士悉降進攻
建昌其子理歸命於是湖廣諸郡次第皆平滔滔江漢
遂底安流總總黎元克全生樂布告中外咸使聞知○
句容儒士戎簡見上語及陳氏之事簡曰向敗陳氏于
九江何不乘勝直抵武昌而乃引還今雖克之亦費力
多矣上曰汝儒者豈不聞覆巢之下完卵乎況事有緩
急兵貴權宜當陳氏兵敗我豈不知乘勝以蹴之兵法
曰窮寇勿追若乘勝急追彼必死鬪殺傷多矣吾故縱
之遣偏師綴其後恐其奔逸料彼剝殘之餘人各偷生

喘息不暇豈復敢戰我以大軍臨之故全城降服一者我師不傷二者生靈獲全三者保全智勇所得不亦多乎簡大悅服上與諸將論用兵方略曰汝等非不善戰然臨事決機智或不足宜親近儒者取古人之善聽其議論以資智識前日戎簡所言吾雖非之然當時校兵有勸我邀之下流而以全師蹙之武昌賊衆可以全獲軍中皆以爲奇謀不知簡亦能言之然皆非吾意也汝等當思之勿以吾不用簡言而遂輕儒者

定大都督府等衙門官制

大都督府都督從一品左右都督正二品同知都督從二品副都督正三品僉都督從三品各行省平章政事

從一品左右丞正二品叅知政事從二品餘侍衛親軍
都護府各衛親軍指揮使司并千戶所鎮撫百戶各品
秩有差上御戟門省臣以所定官制班次圖進上覽畢
因論及諫官曰論道經邦輔弼之臣折衝禦侮將帥之
職論思獻納侍從之任激濁揚清臺察之司此數者朝
廷之要職也至於繩愆糾謬拾遺補過諫諍之臣尤難
其人抗直者或過於矯激巽懦者又無所建明必國爾
忘家忠爾忘身之士方可任之不然患得患失之徒將
何所賴也○帝勅中書省臣曰自古聖帝明王建邦設
都必得賢士大夫相與周旋以成至治今士罕日廣文
武並用卓犖奇偉之才世豈無之或隱於山林或藏於

士伍非在上者開導引援之則在下者無以自見自今有能上書陳言敷宣治道武略出衆者叅軍及都督府具以名聞若其人雖不能文章而識見可取許詣闕面陳其事吾將試之其郡縣官年五十以上者雖練達政事而精力旣衰宣令有司選民間俊秀年二十五以上資性明敏有學識才幹者辟赴中書與年老叅用之十年之後老者休致而少者已熟於事如此則人才不乏而官使得人爾中書其下有司宣布此意悉令知之

庚午置十七衛親軍指揮使司罷江左州郡諸翼

庚午置武德龍驤豹韜飛熊威武廣武興武英武厲揚驍騎神武雄武鳳翔天策振武宣武羽林十七衛親軍

指揮使司先是所得江左州郡置各翼統軍元帥府至是悉罷諸翼而設衛焉

江西行省進鏤金床燬之

江西行省以陳友諒鏤金床進高皇帝觀之謂侍臣曰此與孟昶七寶溺器何異以一床工巧若此其餘可知陳氏父子窮奢極靡焉得不亡即命燬之侍臣曰未富而驕未貴而侈此所以取敗帝曰既富豈可驕既貴豈可侈乎有驕侈之心雖富貴豈能保乎處富貴者正當抑奢侈弘儉約戒嗜欲猶恐不足以慰民望况窮天下之技巧以爲一己之奉乎其致亡也宜矣然此亦足以示戒覆車之轍不可蹈也○廷臣上疏勸帝淵

默以怡養神氣 帝曰汝等所言知常而不知變天下
無事端拱玄默守道無爲此固可以保養神氣顧今喪
亂未定軍旅方殷日給不暇此豈淵默怡神之日耶諸
公之言固愛我但未達時宜耳○帝退朝與孔克仁等
論前代成敗因曰秦以暴虐寵任邪佞之臣故天下叛
之漢高起自布衣能以寬大駕馭羣雄遂爲天下主今
天下之勢不然元之號令紀綱已廢弛矣故豪傑所在
蜂起然皆不知修法度以明軍政此其所以無成也因
感歎久之又曰天下用兵河北有李羅帖木兒河南有
擴廓帖木兒關中有李思齊張良弼然有兵而無紀律
者河北也稍有紀律而兵不振者河南也道路不通饑

餉不繼者關中也江南則惟我與張士誠耳士誠多奸謀而尚間諜其御衆尤無紀律我以數十萬之衆固守疆土修明軍政委任將帥俟時而動其勢有不足平者克仁頓首曰主上神武當定天下于一今其時矣○帝謂徐達等曰人之行事固欲盡善然一時智慮未周既行之後思之有未盡善亟欲更之已無及矣與其追悔於既往曷若致謹於其初大抵更涉世故則智明久歷患難則慮精近日紀綱法度粗若有緒其間或有未盡善者諸公宜執正論亟爲更張庶幾上下之間各得其便苟有不善豈獨予之過亦汝等之責也○帝與詹同等論及時事因言三國時孫權題諸葛子瑜於墮面

與其子恪諧謔。帝曰：君臣之間以敬爲主，敬者禮之本也。故禮立而上下之分定，分定而名正，名正而天下治矣。孫權蓋不知此，輕與臣下戲狎，狎其臣而褻其父，失君臣之道。恪雖機敏，有口才，不能正言自處，招辱於父，失孝敬之心。一諧謔而君臣父子之道虧，舉動如此，何以示訓？大抵君臣言動之際，不可不謹。○帝朝罷退，御白虎殿，閱漢書。侍臣宋濂、孔克仁等在側。帝顧謂濂等曰：漢之治道，不能純乎三代者，其故何也？克仁對曰：王霸之道，褻故也。帝曰：咎將誰執？克仁曰：責在高祖。帝曰：高祖創業之君，遭秦滅學之後，干戈戰爭之餘，斯民憔悴，甫就蘇息，禮樂之事固所未講，獨念孝文爲漢

令主正當制禮作樂以復三代之舊乃逡巡未遑遂使
漢家之業終於如是夫賢如孝文而猶不爲將誰爲之
帝王之道貴不違時有其時而不爲與無其時而爲之
者皆過也三代之主蓋有其時而能爲之漢文有其時
而不爲耳周世宗則無其時而爲之者也○帝坐便殿
問侍臣石勒符堅孰優詹同對曰石勒雖不學而豪爽
脫略料敵制勝舉無遺策符堅窮兵黷武不量已力肥
水敗後身爲俘虜以此言之石勒爲優帝曰不然石
勒當晉室初亂不逢勁敵故易以成功符堅當天下戰
爭日久智勇相角故難爲力夫親履行陣戰勝攻克堅
固不如勦量能容物不殺降附勒亦不如堅然勒聰察

二有餘而果斷不足故馴致石季龍之禍堅聰敏不足而
一寬厚有餘故養成慕容氏父子之亂俱未再世而族類
夷滅所謂匹夫之勇婦人之仁者也

丙申命建忠臣祠于鄱陽湖之康郎山祀與陳友諒諸臣

○巳巳命建忠臣祠于江西南昌府祀陳友諒諸臣先者○壬

戌立部伍法

初 帝招徠降附凡將校至者皆仍其舊官而名稱不
同至是下令曰爲國當先正名今諸將有稱樞密平章
元帥總管萬戶者名不稱實甚無謂其覈諸將所部有
兵五千者爲指揮滿千者爲千戶百人者爲百戶五十
人爲總旗十人爲小旗令既下部伍嚴明名實相副衆

皆悅服以爲良法

始設給事中○蒙古創宰羅帖木兒官爵不受命積郎帖木兒討之

初搠思監徇太子旨誣老的沙及太子宣政院使也先忽都等不軌收其黨煅煉其獄連逮不已元主知其無辜又以老的沙其母舅數諭太子寢其事太子不從搠思監朴不花皆附太子必窮究其事也先忽都等皆貶死又禿堅帖木兒先與右丞也先不花有隙也先不花因譖其詆毀朝政而宰羅素與禿堅友善且知其誣遣人白其非罪太子怒宰羅跋扈交通禿堅不花厯老的沙等同謀下詔削宰羅官爵而奪其兵宰羅拒命遂詔

據庫帖木兒討之

夏四月歲星逆行入端門

自去年九月東行入右掖門犯右執法出端門留三十餘日犯左執法今又通行入端門出右掖門又犯右執法

蒙古孛羅帖木兒舉兵犯闕殺搠思監太子受猷識理達臘出奔

孛羅知詔命調遣皆搠思監所爲非出元主意遂令禿監帖木兒舉兵向闕人居庸關知院也速魯事不蘭奚迎戰不利太子率侍衛兵出古北口東走與松花堅兵至清河列營時京師無備城中大震令百官吏卒分守

使達達國師卽其軍問故以必得糊思監朴不作爲對
詔慰解之不聽乃執二人畀之遂復李羅官爵加太保
仍守禦大同禿堅兵自建德門入覲元主于延春閣恸
哭請罪元主宴資之授平章政事廼引軍還大同

五月愛猷識理達臘還遣兵攻大同李羅帖木兒復舉兵
犯闕愛猷識理達臘率師拒之不利復出奔以李羅帖木
兒爲右丞相

先是太子奔至路兒嶺詔追及之還宮恚怒不已遂命
擴廓帖木兒調兵分道以討李羅其東道以白鎖住領
兵三萬守禦京師中道以貂高竹貞領兵四萬西道以
開保領兵五萬合擊之開保等進迫大同李羅留兵守

大同而自率兵與禿堅老的沙復舉兵向關前鋒入居庸關太子親禦于清河軍潰馳還白鎖住遂引兵扈從太子出順承門由雄霸河間取道達冀寧李羅兵駐建德門外與老的沙入見元主于宣文閣訴其非罪泣元主亦泣李羅欲追襲太子老的沙止之李羅又使翰林承旨張翥草詔削奪擴廓官爵發兵討之翥不從或勸之翥曰吾臂可斷筆不能操元主知其不可奪命他學士爲之遂以李羅爲左丞相尋進右丞相節制天下軍馬老的沙爲平章政事禿堅帖木兒爲御史大夫其部屬皆布列省臺百司李羅既專國遂誅狎臣禿魯帖木兒等罷三宮不急造作沙汰官寺禁西僧作佛事數遣

使請太子還使至太原拘留不報

六月三星晝見○戊戌湖廣安定等處宣撫使向思明等遣溪洞長官硬徹津等以蒙古所授宣勅印章來請改授官命○秋七月癸亥太白歲星合于翼甲子歲星犯左執法○丁丑我師克廬州

先是 帝命左相國徐達等率師取廬州左君弼君弼聞達至懼不敢遁入安豐令其將張渙股從道等城守達等至督兵圍之渙君弼驍將也人以其多智計號爲樓兒張廬州被圍久衆皆飢困不能戰張渙與賈丑潛通款于達請攻東門已爲內應於是我師急攻之城中諸軍悉救東門張渙乃斷釣橋開西門出降達兵入城

執其部將吳副使并左君弼母妻及子送建康以指揮
戴德守之。己卯左君弼部將許榮以舒城來降。帝令
榮還守舒城。改廬州路爲府。令江淮行省平章俞通海
攝省事以鎮之。

八月朔日有食之。○張士誠逐蒙古江浙丞相達識帖睦
邇以其弟士信代之。

時右丞荅蘭帖木兒郎中眞保二人諂事士誠受其金
幣數媒孽達識帖睦邇之短於士誠遂有不容容之勢。
至是士信使面數達識帖睦邇過失勒其自陳老病去
職。又言丞相非士信不可。卽逼取符印遷于嘉興休之。
而士信自爲丞相。士誠又諷行臺爲之請實授王爵許。

化帖木兒不從即使人至紹興索其臺印普化封其印
置諸庫曰我頭可斷印不可與又迫之登舟曰我可死
不可辱也從容沐浴更衣與妻子訣賦詩二章乃仰藥
死臨死擲盃地上曰我死矣逆賊當踵我亡也後數日
達識帖睦爾聞之嘆曰大夫且死吾不死何爲遂命左
右以藥酒進飲之而死初普化爲福建平遠境內皆爲
諸豪所據不能有所施設及遷南臺又逼於士誠而死
然論者以其死較達識爲差勝云

蒙古許有壬卒○乙未命左相國徐達率師按行荆湖等
處

先是陳友諒旣滅荆

郡多欵附至是

帝諭達曰

今武昌旣平。湖南列郡相繼款附。然其間多陳氏部曲。觀風自疑。亦有山寨遺孽。憑恃險阻。聚眾殃民。今命爾按行其地。當撫輯招徠。俾各安生業。或有恃險爲盜者。卽以兵除之。毋遺民患也。

戊戌我師復吉安

先是帝命平章常遇春會鄧愈及金大旺計江西上流。未附州郡。遇春等率兵討新淦之沙坑麻嶺牛陂諸寨。平之。執僞知州鄧志明送建康伏誅。進次吉安。時故陳友諒知院饒鼎臣守吉安。遇春遣人謂之曰。吾今往取。爾可出城一言而去。鼎臣怖惧不敢出。遣其幼子出見。遇春命坐而飲之。又贈以衣服。遣歸曰。歸語而父將飲。

何爲匿而不見吾往矣不能爲爾留可善自爲計此臣
卽夜棄城走安福遇春遂復吉安乃引兵趨潁州

九月辛巳令南昌府康郎山及處州府金華府太平府各
功臣廟有司依期致祭○我師取江陵故陳友諒平章妻
珏以城降

先是珏聞友諒敗遣人來朝高皇帝以書諭之曰王
尚書劉太監至言爾慷慨磊落撫誠歸附予甚嘉之古
云識時務者在乎俊傑今足下知天命之有歸審人心
之所屬以所部全疆來歸其誠可以格天其義可以感
人其惠可以及百姓視彼不知天命不達事機徒欲驅
赤子於鋒鏑而卒取敗亡者豈不大相遠哉且荊州白

昔戰爭之地。今不煩干戈而民獲生全。足下之功不少矣。尚當益修乃職。慎固封守。輯寧軍民。以副予倚注之意。珏得書猶豫。先遣妻子遁去。至是勢窮。自詣達乞降。且曰。當必者珏耳。百姓無辜。達善其言。下令安輯居民。禁民侵擾。列郡聞之。望風歸附。尋改江陵爲荊州府。乙酉。我師取夷陵。故陳友諒守將楊興以城來降。○冬十月辛酉。令中書省用人各適其宜。

帝謂中書省臣曰。立國之初。致賢爲急。中書百司綱領。總率郡屬。須採擇賢者與之共理。但任人之道。小大輕重。各適其宜。若委重於輕。是以拱楠而爲樑棟。委大於

小是以鍾庾而盛斗筭省臣對曰人有才者施於任使
宜無不可帝曰莫耶之利能斷犀象以之斷石則有
缺騏驥之駛能致千里以之服乘則必蹶要必處之
其宜用之盡其才可也○帝謂廷臣曰元本用人
自沙漠一旦據有中國混一海內建國之初輔弼之
率皆賢達所進用者又皆君子是以政治翕然可觀及
其後也小人擅權奸邪競進舉用親舊結爲親黨中外
百司貪婪無耻由是法度日弛紀綱不振至於上崩瓦
解卒不可救今創業之初若不嚴立法度以革奸弊
恐百司因循故習不能振舉故必選用賢能以隆治化
爾等有所薦引當慎所擇

十一月戊子命平章湯和救長興擊張士信兵敗之
十月己未張士誠丞相張士信以兵侵長興守將耿炳
文破之獲其元帥宋興祖士信恚怒復益兵圍長興是
月辛巳命平章湯和率師救長興湯和師至張士信以
兵拒戰自己至申我師內外夾擊敗之虜其士卒八千
餘人獲馬五百餘匹湯和師還

十二月庚寅我師克辰州遂克衡州

先是辰州爲陳友諒左丞周文貴所據達達指揮張彬
將兵討之文貴據白雲關以拒彬與戰敗之文貴棄辰
州走湖南初丙申歲南寧人鄧祖勝以左江義兵萬戶
爲元守衡州歲庚子以兵復永州元以其有功陞爲左

丞至是徐達遣指揮傅友德討之。祖勝棄衡城退保永
州。

乙巳春正月我師克贛州。故陳友諒守將熊天瑞出降。
常遇春兵至贛州。熊天瑞固守不下。高皇帝命平章
彭時中以兵會遇春等共擊之。又命中書右司郎中汪
廣洋參謀軍事。諭廣洋曰。汝至贛如城未下。可與遇春
等言。熊天瑞固處孤城。猶籠禽阱獸。豈能逃逸。但恐則
破之日。殺傷過多。要當以保全生民爲心。一則可以爲
國家用。一則爲未附者勸。且如漢將鄧禹。不妄誅殺。得
享高爵。子孫昌盛。此可爲法。向者鄱陽湖之戰。陳友諒
旣敗。生降其兵。至今爲我用。縱有逃歸者。亦我之民。我

前克湖廣禁軍士毋入城故能全一郡之民苟得郡無
民何益廣洋至贛見遇春等傳帝命時天瑞拒守益
堅遇春乃浚濠立柵以困之遇春圍贛州久以帝命
勿殺故欲困服之天瑞子元震竊出覘兵勢遇春亦從
數騎出猝與相遇元震來襲遇春遣將士揮刀擊之元
震奮鐵撾以拒且鬪且却遇春曰壯男子也舍之至是
天瑞援絕糧盡遣元震出降天瑞尋亦肉袒詣軍門盡
獻其地遇春送天瑞建康帝聞遇春克贛不殺喜甚
遣使褒諭之曰予聞仁者之師無敵非仁者之將不能
行也今將軍破敵不殺是天賜將軍隆我國家千載相
遇非偶然也捷書至予甚爲將軍喜雖曹彬之下江南

何以加之將軍能廣宣威德保全生靈予深有賴焉先是天瑞據贛常加賦橫歛民財及其既降有司仍傳徵之帝曰此豈可爲額耶命亟罷之并免甲辰秋糧之未輸者元震本姓田氏爲天瑞養子善戰有名遇春喜其才勇薦之指揮後復姓田氏

我師克寶慶路蒙古守將唐隆遁去

左相國徐達遣千戶胡海洋取寶慶路克之元守將唐隆遁去於是靖州軍民安撫司及諸長官司皆來降達等賞賚而遣之帝以湖湘旣平命達班師還京甲戌故陳友諒韶州守將張秉彜等南雄守將孫榮祖等皆來降

平章常遇春進師南安遣麾下危止諭鎮南招諭韶州諸郡未下。於是韶州守將同僉張秉彝院判郭容恭政李如章僉事張鵬飛總管錢旭及南雄守將張榮祖等各籍其兵糧來降。遇春令指揮王璵守南雄令秉彝仍守韶州。常遇春軍還。帝御戟門頒賞勞之。

甲申大都督朱文正有罪免官安置桐城。

文正高皇帝兄南昌王子也。少孤。帝撫之愛如己子。既長涉獵傳記勇敢有才略。然深狡強戾人莫敢觸。帝嘗與語曰。汝欲何官。文正卽曰。爵賞不先衆人而急私親。無以服衆。且叔父既成大業。姪何憂不富貴。帝善其言。益愛之。使守江西。遂驕錢暴橫奪民婦女所用床。

榻借以龍鳳爲飾。又恐帝不先封已前所對者皆絕
辭。帝遣人責之。文正慙懼謀叛降張士誠。江西按察
使李欽水奏之。帝曰。此子不才如此。非吾自行無以
定之。卽日往南昌。縶舟城下。遣人詔之。文正不意帝遽
至。倉卒出迎。帝泣謂曰。汝何爲若是。遂載與同舫。至
建康羣臣交章劾之。請寘于法。帝曰。文正固有罪。然
吾兄止有是子。若寘之法。則傷恩矣。乃免文正官。安置
桐城。召其子鐵柱語之曰。爾父不率吾教。恣肆兇惡。以
貽吾憂。爾他日長成。吾封爾爵。不以爾父廢也。爾宜修
德勵行。蓋前人之愆。則不負吾望矣。文正卒。帝封鐵
柱爲靖江王。改名守謙。

二月日旁有一星一月○巳丑蒙古福建行省平章陳友定侵我處州叅軍胡深擊遁之復追敗之遂下浦城○丙午張士誠遣李伯昇寇我諸全之新城嚴州右丞朱文忠擊敗之

先是 帝以謝再興守諸全李夢庚總制諸全軍馬再興以夢庚處已上忿忿不樂遂叛殺知州樂鳳凰妻王氏以身蔽鳳井殺之訖李夢庚奔紹興降于張士誠至是士誠集兵號二十萬遣其將李伯昇挾我叛將謝再興寇諸全之新城部陳延亘十餘里造廬室建倉庫預爲必拔之計守將胡德濟堅壁拒守告急於嚴州行省右丞朱文忠且曰敵兵甚衆非大發兵不能濟文忠遣

指揮張斌元帥張俊率兵出浦江遙爲德濟聲援士誠
又以兵自桐廬邀釣臺烏石將犯嚴州文忠命以舟師
扼之分署諸將各爲備禦以何世明袁洪柴虎居守自
指揮朱亮祖以下悉統以行次浦江下令諸軍啣枚
走新城且檄處州守將以兵來會德濟復遣使以彼衆
我寡爲言請濟師文忠曰昔謝玄以兵八千破苻堅百
萬衆兵在精不在衆也丁巳抵龍潭去敵不二十里有
白氣覆我車上或曰此勝敵之兆也至日晡謀報寇將
至夜四鼓新城知援至潛縋卒以寇中事來報約詰旦
會戰文忠乃集諸將戒曰敵兵甚衆今當盡死力擊之
不如令者斬黎明軍方食候卒告敵兵至文忠令老弱

守輜重悉精銳陣於營外。張左右翼以待之。元帥徐大興湯克明爲左翼。千戶王英葉旺佐之。指揮張斌元帥張俊爲先鋒。關忠郭義佐之。嚴德王德爲右翼。夏子實陶文興佐之。中軍文忠自將之。旣而直營右數里望見烟焰勃興疑爲寇兵。乃分前龍游總制夏仲毅將後軍守隘備之。會處州叅軍胡深亦遣耿天璧援兵適至。文忠復勒兵申約束。於是我軍大奮直前擊之。兩軍旣交。文忠躍馬衝其中堅。當者迎稍而斃。敵中軍梟將周遇等皆披靡謝再興及苗軍見之震懼失色。遂大潰。棄兵甲走自相蹂踐。我軍輜而殲之。逐北十餘里。溪水盡赤。死者以萬數。文忠收兵會食。遣指揮朱亮祖張斌乘勝

追殄餘寇。燔其營落數十。獲士誠同僉韓謙理。周勝忠。元帥周遇。蕭壽山等。六百餘人。軍士三千。馬八百匹。輜重鎧甲甚衆。士誠第五子及其將李伯昇。僅以數騎遁去。

三月白虹貫日。○蒙古太子愛猷識理達臘發兵討李羅帖木兒。李羅幽皇后奇氏調兵拒戰大敗。

時太子在外。日夜謀除內難。至是乃大發諸路兵。分三道而進。自率擴廓帖木兒兵由中道。李羅怒。遂出二皇后奇氏。幽于諸色總管府。既又逼后還宮。取印章偽爲后書召太子。復出而幽之。乃遣禿堅帖木兒率衆攻上都之附太子者。調也速南禦擴廓兵也。速次良鄉。不進。

而謀之於衆皆以爲李羅悖逆中外同憤遂勒兵攻永平遣人西連播磨東連遼陽諸王軍聲大振李羅患之遣驍將姚伯顏不花統兵出拒至通州河溢營虹橋以待也速出其不意襲而破之擒斬姚伯顏李羅大怒自將出通州三日大雨而還時后亦數納美女於李羅至百日始還○初擴廓帖木兒將輔太子入討李羅遣使傳太子旨賜張禎以上尊且訪時事禎復書曰合燕趙齊魯之境大河內外長淮南北悉爲圯墟閭閻之區所存無幾江右日思荐食上國湘漢荆楚川蜀淫名僭號幸我有變利我多虞閣下國之右族三世二王得不思廉藺之於趙寇賈之於漢乎京師一殘假有不逞之徒

崛起草澤。借名義尊君父。倡其說於天下。閣下將何以處之。守京師者。能聚不能散。禦外侮者。能進不能退。紛紛籍籍。神分志奪。國家之事。能不爲閣下發乎。志曰。不備不虞。不可以爲師。僕之惓惓爲言者。獻忠之道也。然爲言大要有三。保君父一也。扶社稷二也。衛生靈三也。請以近似者陳其一二。衛出公據國。至於不父其父。趙有沙丘之變。其臣成兌平之。不可謂無功。而後至於不君其君。唐肅宗流播之中。怵於邪謀。遂成靈武之篡。千載之下。雖有智辨百出。不能爲雪。嗚呼。是豈可以不鑒之乎。然吾聞之。天之所廢。不驟也。驟其得志。肆其寵榮。使忘其覺悟之心。非安之也。厚其毒而降之罰也。天遂

其民厭其汰而鬼神弗福也其能久乎閣下覽想焉
必起通其往來之使達其上下之情得其情則得其
策矣孔子曰君君臣臣父父子子今九重在上者如寄
青宮在下者如寄生民之憂國家之憂也可不深思而
熟計之哉據廓帖木兒深納其說

夏四月己丑叅軍胡深進攻建寧之松溪克之獲陳友定
守將張子玉而還○庚寅命平章常遇春取湖廣襄漢諸
郡

帝嘗與徐達常遇春論襄漢形勢謂曰安陸襄陽跨連
荆蜀乃南北之喉襟英雄所必爭之地今置不取將貽

後憂况沔陽新附。城中人民多皆陳氏舊卒。壤地相親。易於扇動。辟之樹木。安陸襄陽爲枝。沔陽爲幹。幹有損。枝葉亦何有焉。今宜增兵守沔陽。而出師以安陸襄陽。庶幾不失其宜。至是遂命遇春將兵以往。

五月災惑犯太微垣。○蒙古大都雨雹。

雉長尺餘。或言于元主曰。龍鬚也。命拾而祀之。○戊申元京師大雨。有魚隨雨而落。長尺許。人取而食之。

乙亥我師克安陸。遂克襄陽。

先是帝命遇春往取安陸及襄陽。諭之曰。堅城之下。難以猝攻。緩之則煩三軍之銳氣。急之恐驅人以冒矢石。宜相機招徠。以輯寧其民。復調江西行省右丞御愈。

爲湖廣平章政事領兵繼其後使人謂愈曰今遣遇春
取安陸襄陽汝當以兵繼之凡得州郡汝宜駐兵以撫
降附近聞王保保集兵汝寧彼之所爲如築堤壅水惟
恐滲漏汝之往也能愛軍恤民則仁聲義聞被於遠邇
人心之歸猶水走下正如穿穴其堤使所聚之水洩漏
用力少而成功多愈奉命遂行至是遇春攻安陸其守
將任亮出拒戰遇春擊敗之執亮遂克其城以沔陽衛
指揮吳復守之己卯常遇春至襄陽守將棄城遁遇春
追擊之俘其衆五千獲馬一千八百餘匹糧八百餘石
元僉院張德山羅明以穀城降遇春遣人送德山等赴
建康

丁酉我師克安福故陳友諒將饒鼎臣射死

鼎臣字志康

國寶擊潰之

壬子我師克溫之樂清擒方國珍鎮撫周清

等械送建康命戊常州○我師克崇安遂進攻建寧叅軍

胡深爲陳友定將阮德柔所執遇害

先是叅軍胡深言近克松溪獲張子玉餘衆敗奔崇安

請發廣信撫州建昌三路兵併攻之因取八閩帝如

深言命廣信衛指揮朱亮祖由鉛山建昌左丞王溥由

杉關會胡深進兵擊之朱亮祖等克崇安遂進攻建寧

時陳友定將阮德柔嬰城固守我師次城下亮祖即欲

攻之胡深視氛祲不利謂亮祖曰天時未協將必有災

未可與戰亮祖曰叅軍何得以災爲解師已至此庸可

綴乎。且天道玄遠。山澤之氣。變態無時。何足徵也。迨深進兵。深猶不可。適德柔兵屯錦江。逼深陣。後亮祖咎深督戰益急。深不獲已。遂引兵鼓譟進擊之。破其二。聞德柔盡率精銳拒深軍圍之數重。時日已暮。深知營壘未安。而兵圍不解。難以持久。卽突圍而出。德柔伏兵忽起。深馬蹶。遂爲所執。送于友定。深盛稱帝神聖威武。羣雄屬心。以諭友定。友定本無殺深意。會元使至。督迫之。深遂遇害。

六月蒙古太子愛猷識理達臘加李思齊平章政事。邪國公○秋七月。鎮星歲星熒惑聚于角亢。○蒙古字羅帖木兒老的沙禿堅帖木兒等皆伏誅。

李羅先嘗以疑殺其將保安既又失姚伯顏鬱鬱不樂
乃日與老的沙等飲宴荒淫無度又酗酒殺人喜怒不
測威順王之子和尚忿其無君數言于元主受密旨與
徐士本謀結勇士上都馬金那海伯達刺等陰置刺之
至是秃堅帖木兒遣使來告攻上都之捷李羅入奏行
至延春閣下伯達兒自衆中奮出砍之中其腦死老的
沙趨出擁李羅家属北遁詔民間盡殺其黨既而老的
沙被執伏誅秃堅引輕兵走入思兒之地尋亦討斬之
時遇變城門不開者三日竹貞貊高軍至城外緣城而
上碎平則門鍵以入大掠於都市

丁巳命鄧愈戍守襄陽以王天錫爲湖廣行省都事

丁巳命降將張德山歸襄陽招徠未附山寨 帝諭之
曰自古豪傑識幾於未形故夏將亡而終古先奔於商
殷將亡而向藝先歸於周若待其迹之著見而後來歸
者此常人非豪傑也汝能審存亡之機推誠歸我實有
可嘉汝之才如美箭利鏃必求善射者用之庶不枉其
才倘付之於不善射者豈不重可惜哉今令爾歸襄陽
招徠未附當曉以大義告以成敗之由俾知所以圖存
能全衆而來功亦不細矣因厚賜而遣之又賜鄧愈書
曰予命爾戍守襄陽法度既定切宜謹守已遣張德山
招徠山寨若其嘗爲兵者仍俾爲兵舊爲民者宜歸之
有司俾安農業軍人小校亦令屯種且耕且戰古有成

規可以取法且爾所守之地鄰於王保保若汝之惠愛
加於民法度行於軍則彼之部曲脇從者望風來歸如
脫虎口以就慈母吾之與汝義雖君臣恩同骨肉所以
諄諄告語者以成事甚難而債事甚易故欲汝謹法度
施惠愛勿妄殺無罪若有罪者亦宜詳審古之良將以
仁義爲先勇略次之汝能自勉則邊境可寧而予無外
顧之憂矣辛酉以王天錫爲湖廣行省都事諭之曰汝
往襄陽贊助鄧平章設施政治當參酌事宜修城池練
甲兵樽節財用撫綏人民處事貴於果斷御衆必以鎮
靜密以防奸謹以待敵敵至則堅壁清野以乘其弊慎
勿輕犯其鋒方鎮之寄固在將帥贊畫之助實資幕僚

恪盡厥心毋負吾委任之意

乙丑蒙古思州宣撫使田仁厚遣使來獻府州縣地

元思州宣撫使兼湖廣行省左丞田仁厚遣其都事林憲萬戶張思溫來獻鎮遠吉州軍民二府婺川功水常寧等十縣龍泉瑞溪沿河等三十四州皆其所守地也於是命改宣撫司爲思南鎮西等處宣慰使司以仁厚爲宣慰使

八月平章鄧愈取襄陽之竹山縣蒙古平章余思志以其衆降○九月蒙古太子愛猷識理達臘還大都

元主遣使函李羅首往巢寧召太子還攝廓帖木兒遂扈從至京師詔以伯撒里爲太師右丞相擴廓帖木兒

爲太尉左丞相知樞密院

丙辰置國子學于應天府

以故集慶路學爲之設博士助教學正學錄典樂典書等官以許存仁爲博士

冬十月戊戌下令征張士誠

戊戌 帝以張士誠屢犯疆場欲舉兵征之下令曰王者征伐應天順人所_以禍亂而安生民也張士誠假元之命叛服不常天將假手於我是用行師以致天討況士誠啓衆多端襲我安豐_迄我諸全連兵構禍罪不可逭今我大軍致討止於罪首在彼軍民無恐無畏毋妄逃竄毋廢農業已勅大將軍約束官軍毋致殺掠違者

以軍律論罪布告中外體予至懷

辛丑命左相國徐達平章常遇春等取泰州

時張士誠所據郡縣南至紹興與方國珍接境北有通
泰高郵安徐宿濠泗又北至濟寧與山東相距 帝欲
先取通泰諸郡縣勇士誠肘翼然後專取浙西故命達
總兵取之達兵旣出江口 帝遣使諭達曰邇聞王保
保兵入關中爲李思齊張良弼逐出潼關還至汴梁復
東取樂安又爲俞寶所敗追過清河溺死者甚衆今王
保保驅其人民已北遁矣孔興脫烈伯天保奴兵走三
晉汴梁唐鄧南陽之間餘兵據守尚未寧息河南洛河
水決漂蕩三千餘家天下擾擾如此當何時可定也此

迺此消息汝宜知之夫軍旅重事尤宜加慎如獲張上
誠將校遣來吾自處之乙巳徐達兵趨泰州浚河通州
師遇張士誠兵擊敗之獲馬三十疋舡二百艘遂駐軍
於海安壩上下未徐達兵圍泰州新城擊敗士誠湖北
援兵獲其元帥王成卒四百餘人已酉士誠淮安李院
判來援泰州常遇春又擊敗之擒萬戶吳聚等一百二
十九人時江陰水寨守將康茂才報張士誠以舟師四
百艘出大江次范蔡港別以小舟於江中孤山往來出
沒無常疑有他謀請爲之備帝卽日遣使諭徐達曰
近得康茂才報張士誠以舟師往來江中吾度此寇非
有次江陰直趨上流之計不過設詐疑我使我陸寨之

兵遠備水寨我兵旣分彼將乘我水軍疾趨陸寨誘吾
之虛此寇一計也爾宜備之又聞常遇春出海安七十
餘里擊寇之兵不過萬人此非抗我大軍之勢蓋欲誘
遇春深入俟我軍去泰州旣遠彼必潛師以趨海安或
趨泰州令我軍勢分首尾衝決不及救援此又寇一計
也兵法致人而不致于人爾宜審慮使至即令遇春駐
師海安慎守新城坐以待寇彼若遠來趨敵吾以逸待
勞可一戰而克泰興以南並江寇舟亦宜設法備之又
占候此月二十九日堅壁勿輕出若彼來攻則常速戰
及十一月初十日十一日皆慎勿出兵至十二日十三
日乃可用師己未帝復遣使諭徐達曰寇兵初駐范蔡

港吾度其有詐今觀望猶豫不敢卽泝上流其爲詐益明然寇計不過欲分我勢非有決機攻戰之謀宜遣陳永忠還兵水寨大軍勿輕動此寇徘徊江上自老其師乘其怠慢此月必克泰州泰州旣克江北瓦解寇不戰自潰但宜謹備之耳

蒙古以方國珍爲淮南左丞相○閏十月蒙古封擴廓帖木兒爲河南王總制諸道軍馬

時伯撒里累朝勲舊擴廓帖木兒後生晚進與之並相居兩月卽請南還視師是時中原無事而江淮川蜀皆已陷沒太子累請躬出督師征討元主難之乃詔封擴廓河南王代之視征總制關陝晉冀山東諸道并進南

一應軍馬凡黜陟予奪悉聽便宜行事擴廓官屬之
幾與朝廷等尋還河南欲廬墓以終喪左右咸以爲受
命出師不可中止乃復北渡居懷慶又移居彰德
戊辰我師克永新執周安等送建康伏誅

初周安據永新陳友諒亡安即來附命仍守永新及我
師入安福討饒鼎臣安疑而復叛仍與諸山寨相結拒
命平章湯和進兵攻之安出拒戰和擊敗之克其十七
寨遂圍其城帝遣使諭周安曰爾本我之武臣分守
境土近因大軍征討逆賊饒鼎臣爾等心懷疑懼故至
於此旅拒王師已及三月糧絕力盡欲遁則無所歸欲
降則俱不受以此偷生日暮予聞之惻然于懷恐城下

之日玉石不分使我赤子肝腦塗地咎有所歸令到之日果能革心效順棄甲來歸悉宥前愆安等仍猶豫未決至是湯和克永新執周安等送建康斬之

庚辰我師克泰州

徐達常遇春克泰州虜張士誠將嚴再興夏思忠張士俊等凡十四人卒五千馬一百六十餘疋以所俘五千人送建康報捷復以守城事宜爲請帝遣使諭達新舊二城自度可否以便宜處之其未下諸城宜乘勝進取癸未命以徐達所送泰州俘五千人安置潭溪二州時天寒命人賜衣一襲婦女亦皆賜衣履鍼線布帛初衆自以抗拒必不免及得賜又妻子完聚咸感悅拜呼

去而

十一月太白辰星熒惑聚斗○張士誠遣兵寇我宜興命
徐達率兵擊敗之○十二月歲星掩房○張士誠遣兵寇
吉安我守將贊子賢擊却之

江左陸翽之手校